

# Ils 13 d'avrigl 1204

## Cruschads spoglian Constantinopel

DA GUIU SOBIELA-CAANITZ

■ «I n'ha mai dà in malfatg pli grond encunter la carstgaunadad che la quarta cruschada» (1). Uschia ha in grond medievist dal 20avel tschientaner definì quell'agressiun militarà occidentala, instigada da Vaniescha e manada d'in prinzi piemontais, che ha triumfà ils 13 d'avrigl 1204, er in mardi, cun la conquista, spogliaziun e ruina da Constantinopel, chapitala da la cristianadad orientala. Vairamain èsi in sarcassem da numnar «cruschada» lezza guerra da rapina encunter in pajais cristian, sco che l'istoriografia tradiziunala fa. Strusch otgtschient onns pli tard, ils 4 da matg 2001 ha papa Gion Paul declerà ad Aten avant ils uvestgs grecs ortodoxs: «Nus supplitgain Dieu d'ans perdunar per tut quels putgads ch'ils figls e las figlias da la Baselgia catolica han commess encunter ils fragliuns ortodoxs. Insaquantas regurdientschas fan spezialmain mal; plis eveniments dal passà lontan han laschà enavos blessuras profundas en il spiert ed il cor dals umans. Jau manegiel las spogliaziuns e devastaziuns da la citad imperiala da Constantinopel» (2). La patria polacca dal papa n'aveva in summa nagut da far cun il grond malfatg da 1204; ils plis schuldads vegnivan da l'Italia dal nord, las Burgognas, la Champagne e Flandra. Ma Gion Paul s'exprimeva en num da l'Occident catolic. Oz, gist otg seculs suenter lez di da malencurada duainsa far endament co ch'igl è vegnì adaquella ch'ina cruschada destinada per il Proxim Orient ha «mo» devastà la «segunda Roma» e parti ses imperi.

### L'Occident prepara la guerra sontga

La Baselgia catolica e l'Imperi roman tudestg resguardavan l'Imperi roman d'Orient e ses patriarcad sco cristians renitents encunter l'autorità dal papa e ses appels a la guerra sontga. A la terza cruschada (1187–1192) n'èsi betg reussi da salvar Jerusalem. En l'Occident resguardavan blers l'Imperi d'Orient sco responsabel da lur disfatga perquai ch'el n'aveva betg fatg part da la guerra. Quai è vegnì fitg dretg ad Enrico Dandolo (†1205), «doge» da Vaniescha dapi 1192, perquai che l'usurpader Alexi III (†1210), imperatur d'Orient, favurisava Genova e Pisa encunter la regina dal Mar adriatic. En schaner 1198 è Lotario da Segni (1160–1216) vegnì papa sco Innocent III. El ha predeggià pliras cruschadas, t. a. gia en avust 1198, cunzunt en la Frantscha dal nord, en-



Avant 800 onns è Constantinopel vegnì spoglià e ruinà. MAD

cunter l'islam. Ils trais conts da Blois, Champagne e Flandra han surpiglià la direziun da la guerra; lur delegà plenipotenziari ha sutscrit 1202 in contract cun il «doge» per il transport dals cruschads en l'Egipta. Ma a medem temp ha Dandolo empermess a mess dal sultan da na sustegnair nagina expediiziun encunter l'Egipta. Igl è reussì al «doge» da star da pled al sultan senza violar il patg cun ils cruschads. Igl è numnadain sa palesà che lez eran insolvents e na pudevan pajar il pretsch cunvegè per lur transport.

### Lodi encunter ils Grecs

Sin quai (1203) è cumparì il prinzi grec Alexi (1182–1204) che vuleva vegnir imperatur d'Orient empè da l'usurpader Alexi III; el ha supplitgà Bonifaci da Monfrà/Monferrato (†1207), schefcumandant dals cruschads, d'al gidar a muntar sin il tron: «Lura empermettes prinzi Alexi als cruschads da pajar lur debit envers ils Venezians, d'als furnir ils daners ed il provediment basignaiels per conquistar l'Egipta, cun in rinforz da 10 000 schuldads grecs (...) e da sutta-metter la Baselgia ortodoxa a Roma. Bonifaci ha rapportà las propostas a Dandolo; lez è stà intgantà (...). Ins aveva persvas ils cruschads che l'Imperi roman d'Orient haja adina tradi la cristianadad (...). Ils schuldads devozius sa legravan da pudair gidar a manar ils renitents grecs en il triep catolic; ils schuldads pli seculars faschevan endament las ritgezzas da Constantinopel e la prosperità da sias provinzas (...). Grazia a tut il vegl resentiment da l'Occident encunter la cristianadad orientala, han Dandolo e Bonifaci persvas tgunsch l'armada da sustegnair il plan» (3). Ils cruschads han pia bloccà la citad imperiala e mess il prinzi sin il tron sco Alexi IV. Ma quest ha sa fatg uschè malvis tar il pievel ch'el è vegnì mazzà d'ina revolta en favrer 1204. Ils cruschads han lura decis da conquistar la chapitala e da metter in um ord lur ra-

vugl sin il tron imperial. Ils 13 d'avrigl hani vairamain conquistà Constantinopel. «Trai dis a la lunga hani mazzà e sblundergià en ina moda ch'ins na po dir. Stgais culturals da valur inimaginabla èn ids en malura en ils mauns da la soldatesca barbara. Ils Venezians han rapinà ils quatter chavals renumnads dal 6avel tschientaner ch'orneschan oz la fatschada dal dom da s. Marc» (4); uss èn ils originals en il Museo Marciano, sur ils pierrens da la basilica.

### L'ierta da l'imperi ruinà

Ils victurs han elegì e curunà imperatur cont Balduin da Flandra (1171–1205). «I han latinisà la baselgia per forza, cun in patriarc latin, il Venezian Tommaso Morosini. Ins ha sfurzà si il cult divin catolic e la ductrina romana. Ils spirituals ortodoxs han stuì sa sutta-metter a la Baselgia catolica ed engirar da far per cumond al papa» (5). Ma lez imperi «latin», vairamain ina colonia da la Frantscha dal nord, ha pudì surviver mo fin a 1261. A Nicaia en l'Asia minura (oz Iznik en Turchia) è Teodor Lascaris (†1222) vegnì curunà imperatur roman d'Orient 1208 cun la benedicziun dal patriarc ortodox, restaurond l'imperi da Constantin. Ses successur Gion Vatazes (†1254) han renconuschì il papa, l'imperatur tudestg ed il zar bulgar. Uschia è Constantinopel vegnì puspè 1261 chapitala dal vegl imperi che ha survivì fin a 1453. Profità da la catastrofa da 1204 ha cunzunt la pussanza maritima veneziana. La republica adriatica ha annectà pliras inslas e plis ports dal Mar mediterranean. Insaquantas inslas èn restadas possess da Vaniescha enfin a sia ruina 1798, t. a. Sàcutos (talian Zante), patria dal poet Ugo Foscolo (1778–1827), figl d'ina Greca e d'in patrizi venezian. Suenter la conquista tirca da Constantinopel ha Vaniescha dà ospitalità a blers scienziads grecs; ovras grecas ha squitschà e publicgà la chasa editura fundada da l'umanist e stampadur venezian Aldo Manuzio (1450–1515). Quai fiss ina reparaziun modesta per la devastaziun da Constantinopel.

1) Steven Runciman, *A History of the Crusades. Tom 3. Harmondsworth, Middlesex (Penguin Books) 1965, p. 130.*

2) Cità en: «G2W» 4/2004, p. 14. Adressa: Glaube in der 2. Welt, Birmensdorferstraße 52, 8004 Turigt. Posta electronica: g2w.sui@bluewin.ch

3) Steven Runciman (sco nota 1), pp. 115–116.

4) Hans Eberhard Mayer, *Geschichte der Kreuzzüge. Stuttgart (Kohlhammer) 1965, p. 178.*

5) Erich Bryner en: «G2W» 4/2004 (sco nota 2), p. 14.